

四庫全書

史部

欽定四庫全書

史部

通志卷八十五上

詳校官侍讀_臣陳萬青

編修_臣裴謙覆勘

覆校官助教_臣金學詩

校對官助教_臣黃昌祺

謄錄監生_臣鄭嶠

欽定四庫全書

通志卷八十五上

宋右廸功郎鄭樵漁仲撰

宗室傳第八上

北齊

趙郡王琛

子獻

清河王岳

子勤

廣平公盛

子瑗

陽州公永樂

子整

襄樂王顯國

上洛王

思宗

子阮海

平秦王歸彥

武興王晉

長

樂太守靈山

子懿 繼子伏
護 伏護孫人

神武諸子

永安簡平王浚

平陽靖翼王淹

子德彭城景思王

浚

子寶德

上黨剛肅王渙

子寶嚴

襄城景王清

繼子亮

任

城王潛

高陽康穆王湜

博陵文簡王濟

華

山王凝

馮翊王潤

漢陽敬懷王洽

文襄諸子

河南康獻王孝瑜

子弘節

廣寧王孝珩

河間王孝

琬

子正禮

蘭陵武王長恭

安德王延宗

漁陽王

紹信

文宣諸子

太原王紹德

范陽王紹義

西河王紹仁

隴

西王紹廉

孝昭諸子

樂陵王百年

汝南王彥理

弟彥德
彥康

彥忠
彥基

武成諸子

南陽王綽 琅琊王儼 齊安王廓 北平王貞

高平王仁英 淮南王仁光

弟仁機

仁邕

仁

直
仁謙

後主諸子

東平王恪

善德

買
實錢

北齊

趙郡王琛字元寶神武皇帝之弟也少便弓馬有志氣
神武既定天下中興初授琛常侍鎮西將軍既居禁衛

恭勤慎密率先左右封南趙郡公累遷定州刺史六州
大都督甚有聲譽及斛斯椿等釁結神武將謀內討以
晉陽根本召琛留掌後事天平中除御史中尉正色糾
彈無所迴避遠近肅然尋亂神武後庭因杖而薨時年
二十三贈太尉尚書令謚曰貞天平三年又贈假黃鉞
左丞相太師錄尚書事天統初進爵為王配饗高祖廟
庭子叡嗣小名須拔生三旬而孤聰慧夙成特為神武
所愛養於宮中令游嬖母之恩同諸子魏興和中襲爵

南趙郡公年至四歲未嘗識母其母魏華陽公主也其從母姊鄭氏戲謂曰汝是我姨兒何反親游氏叡因訪問遂失精神神武疑其感疾叡對曰兒無患但聞有所生欲得暫見神武驚命元夫人至就宮見之叡前跪拜因抱頸大哭神武甚悲傷謂平秦王曰此兒天性至孝我兒無及者遂為休務一日叡初讀孝經至資於事父輒流涕歔歔十歲喪母神武親送至領軍府為發哀舉聲殞絕三日水漿不入口神武與武明太后慙慙敦譬

方漸承旨居喪長齋骨立柱而後起神武令恒山王與同卧起日夜譬之并勅左右不許進水雖絕清漱午輒不肯食由是神武食必呼與同案神武崩復哭泣歐血及壯將婚娶而貌有戚容文襄謂曰我為爾娶鄭述祖女門閥甚高當無可憾而反不樂何邪獻對曰自痛孤遺方從婚冠彌用感切言未卒嗚咽不自勝文襄為之憫然勵之勤學常夜分方罷文宣受禪進爵為王獻身長七尺容儀甚偉閑習吏職有知人之鑒天保二年為

定州刺史六州大都督時年十七獻留心庶事糾擿奸邪稱為良牧六年詔領山東兵數萬監築長城于時盛夏獻屏除盖扇親與軍人同勞苦長史永欽道以獻冒暑遣倍道送冰獻對之歎息云三軍之人皆飲溫水吾何心獨進寒冰遂至銷液竟不一嘗兵人感悅先是役罷任其自歸丁壯先返羸弱多致僵殞獻於是親率營伍彊弱相持賴全者十三四焉八年除北朔州刺史都督長城諸鎮事獻慰撫新遷量置烽戍內外防禦備有

條法大為兵民所安有乏水處獻禱而得泉州人至今
號曰趙郡王井九年濟南以太子監國因立大都督府
與尚書省分理衆事仍開府置佐史文宣特崇其選乃
除獻侍中攝大都督府長史獻後因侍宴帝從容顧謂
恒山王演曰由來亦有如此長史不皇建初兼并州事
孝昭崩預受顧託奉迎武成於鄴以功拜尚書令天統
中追贈父琛假黃鉞母元氏贈趙郡王妃謚曰貞昭華
陽長公主如故有司備禮儀就墓拜受時隆冬盛寒獻

徒步號哭面皆破裂歐血數升及還不堪參謝帝親就第省問拜司空攝錄尚書事河清三年周師及突厥至并州武成戎服將以宮人出避獻叩馬諫乃止帝親御戎六軍進止並令取獻節度而使段孝先總馬帝與宮人被緋甲登故北城以望軍營甚整突厥咎周人曰爾言齊亂故請我共來伐之今齊人眼中亦有鐵何可當邪乃還至涇嶺凍滑乃鋪氊以度胡馬寒瘦膝已下皆無毛比至長城死且盡乃截稍杖之以歸是役也段孝

先持重不與賊戰自晉陽東道為虜所屠無遺類焉斛
律光自三堆還帝以遭大寇抱其頸哭任城王潛進曰
何至此乃止光面折孝先於帝前曰段婆善為送女客
於是以獻為能加尚書令封宣城郡公拜太尉監五禮
晚節頗為和士開所構獻久典朝政清正自守譽望日
隆漸被疏忌乃撰古之忠臣義士號曰要言以致其意
武成崩葬後數日獻與馮翊王潤安德王延宗及元文
遙等奏後主云和士開不宜仍居內任并入奏太后因

出士開為兗州刺史太后曰士開舊經驅使欲留過百
日獻正色不許太后令酌酒賜獻獻正色曰今論國家
大事非為卮酒言訖便出其夜獻方寢見一人可長丈
四五尺臂長丈餘當門向牀以臂壓獻良久遂失所在
獻意甚惡之起坐歎曰大丈夫運命一朝至此至旦欲
入朝妻子咸諫止之獻曰自古忠臣皆不顧身命社稷
事重吾寧死事先皇不忍見朝廷顛沛至殿門又有人
曰願勿入獻曰吾上不負天死亦無恨入見太后太后

復以為言獻執之彌固出至永巷被執送華林園於崔
離佛院令劉桃枝拉而殺之時年三十六大霧三日朝
野冤惜之期年後詔聽以王禮葬竟無贈謚子整信嗣
好學有行檢位儀同三司後終於長安

清河王岳字洪畧神武從父弟也父翻字飛雀以器度
知名卒於侍御中散元象中贈假黃鉞大將軍太傅太
尉錄尚書事謚孝宣公岳幼孤貧人未知之長而敦直
姿貌嶷然深沈有器量初岳家于洛邑神武每奉使入

洛必止于岳宅岳母山氏嘗夜起見神武室中有赤光
心異之詣卜者為之筮遇乾之大有占者曰飛龍在天
之象也貴不可言山氏以語神武神武益自負及神武
起兵信都山氏聞之喜謂岳曰赤光之瑞驗矣汝可間
行從之岳遂往信都神武見之大悅中興初除金紫光
祿大夫領武衛神武與四胡戰於韓陵神武將中軍高
昂將左軍岳將右軍中軍敗績賊乘之岳舉麾大呼橫
衝賊陣神武方得回師因大破賊以功除衛將軍左光

祿大夫封清河郡公母山氏封郡君授女侍中入侍皇
后天平二年除侍中六州軍事都督尋加開府岳辟引
時賢以為僚屬論者美之尋授使持節六州大都督冀
州大中正俄拜京畿大都督其六州事悉隸京畿神武
統務晉陽岳與侍中孫騰等在京師輔政岳性至孝母
疾衣不解帶及遭喪去職哀毀骨立神武憂之每日遣
人勞勉尋起復本位歷冀晉二州刺史西南道都督有
綏邊之稱及神武崩侯景叛梁武帝遣其貞陽侯淵明

於寒山擁泗水灌彭城與景相為犄角岳總帥諸軍南
討與行臺慕容紹宗擊淵明破禽之俘馘數萬景仍擁
衆於渦陽與左衛將軍劉豐等相持岳廻軍又破之景
單騎逃竄以功除侍中太尉又拜河南總管統慕容紹
宗劉豐等討西魏將王思政於長社岳引洧水灌其城
紹宗劉豐為思政所獲西魏援兵復至岳內外防禦城
不沒者三版會文襄親臨數日城陷獲思政等以功別
封真定縣男是役也文襄以為已功故賞典不弘文襄

崩文宣出撫晉陽令岳以本官兼尚書左僕射留鎮京師天保初進封清河郡王尋除司州牧五年加太保梁元帝為西魏所逼遣使告急詔岳為西南道大行臺統司徒潘相樂等救江陵師次義陽西魏尅荊州岳因畧地南至梁郢州尅之獲刺史司徒陸法和送鄴朝廷知江陵陷詔岳班師岳自討寒山長社及出隨陸並有功績威名彌重而性華侈尤悅酒色歌姬舞女陳鼎擊鐘諸王不及也初高歸彥少孤神武令岳撫養岳輕其年

幼情禮甚薄歸彥內銜之及歸彥為領軍大被寵遇岳謂其德已更倚仗之歸彥密構其短奏岳於城南起宅聽事後僭擬為永巷但無闕耳帝後夜行見宅壯麗意不能平屬帝時召鄴下婦人薛氏入宮而岳先嘗迎之至宅由其姊也帝怒縣薛氏姊而支解之讓岳以為姦人之女岳曰臣始聞其美欲納以為婦見其輕佻故出之非奸也帝益怒六年冬使高歸彥就宅賜以鴈岳曰臣無罪歸彥逼飲之遂薨時年三十四詔大鴻臚監護

喪事贈使持節都督冀等七州太宰太傅定州刺史假黃鉞給輜輶車謚曰昭武勅以城南宅為莊嚴寺初岳與神武經綸天下家有私兵戎器儲甲千餘領文襄之末岳以四方無事表請納之文襄敦至親之重推心相任云叔屬居肺腑職在維城所有之甲本資國用叔何疑而納之文宣之世亦頻請納又不許及將薨遺表謝恩并請上甲于武庫至是方納焉皇建中配享文襄廟庭後歸彥反武成知其前譖曰清河忠烈盡力皇家而

歸彥毀之間吾骨肉籍沒歸彥以歸彥良賤百口賜岳家又思岳功重贈太師太保餘如故子勸字敬德幼聰敏美風儀以仁孝聞年七歲襲爵清河王十四為青州刺史拜日文宣戒之曰叔父前牧青州甚有遺惠故遣汝慰彼黎庶無墜家聲勸流涕對曰臣以蒙幼濫叨拔擢雖竭庸愚懼忝先正文宣曰汝既能如此言吾不慮也尋追授領軍大將軍開府儀同三司以清河地在畿內改封樂安王性剛直有才幹解律光雅敬之每征伐

則引為副轉侍中尚書右僕射後主於晉州敗太后從
土門道還京師勅勸統領兵馬侍衛時佞幸閹寺猶行
暴虐民間雞豕悉縶鷹犬搏噬取之勸收儀同荀子溢
將斬以徇太后有令然後釋之劉文殊謂勸曰子溢之
徒言成禍福豈不慮後邪勸攘袂曰自獻武皇帝以來
撫養士卒委政親賢用武行師未有折衄今西寇已次
并州達官委叛正坐此輩專政弄權所以內外離心衣
冠解體若得今日斬此輩明日受誅亦無所恨文殊甚

魏之太后還至鄴周軍續至人皆兇懼無有關心朝士
出降相屬勸因奏後主曰今所翻叛多是貴人至於卒
伍猶未離貳請追五品已上家屬置之三臺因脅之曰
若戰不捷即焚此臺此曹願惜妻子必當死戰且王師
頻北賊徒輕我今背城一決理必破之後主不從遂棄
鄴東遷勸恒後殿為周軍所得武帝與語大悅因問齊
亡所由勸發言流涕悲不自勝帝為改容授開府儀同
三司隋文帝為丞相深器之再遷楚州刺史城北有伍

子胥廟其俗尚鬼祈者必以牛酒至破產業勸嘆曰子
胥賢者豈宜損百姓乎告諭所部自是遂止百姓賴之
開皇七年轉光州刺史表請伐陳并平陳五策帝嘉之
荅以優詔及大舉伐陳以勸為行軍總管從宜陽公王
世積下陳江州以功拜上開府賜物三千段時隴右諸
羌數為寇亂朝廷以勸有威名拜洮州刺史下車大崇
威惠民夷悅附後吐谷渾來寇勸時遇疾不能拒戰賊
遂大掠而去憲司奏勸失亡戶口坐免卒於家唐褒顯

前代名臣追贈都督四州諸軍事定州刺史子士廉寂
知名

廣平公盛神武從叔祖也寬厚有長者風神武起兵於
信都盛來赴以為中軍大都督封廣平郡公歷位司徒
太尉天平三年薨於位贈假黃鉞太尉太師錄尚書事
無子以兄子子瑗嗣天保初改封平昌王卒於魏尹

陽州公永樂神武從祖兄子也太昌初封陽州縣伯進
爵為公累遷北豫州刺史河橋之戰司徒高昂失利奔

退永樂守洛陽南城昂走趣城南西軍追者將至永樂
不開門昂遂為西軍所禽神武大怒杖之二百後罷豫
州家產不立神武問其故對曰裴監為長史辛公正為
別駕受王委寄斗酒隻雞不敢入神武乃以永樂為濟
州仍以監公正為長史別駕謂永樂曰爾勿大貪小小
義取莫復畏永樂至州遽有受納監公正諫不見聽以
狀啟聞神武封以示永樂永樂由是知二人清直並擢
用之後卒於州贈太師太尉錄尚書事謚曰武昭無子

從兄思宗以第二子孝緒為後襲爵天保初改封修城
郡王永樂弟長弼小名阿伽性麤武出入城市好歐擊
行路時人呼為阿伽郎君以宗室封廣武王時有天恩
道人至凶暴橫行閭肆後入長弼黨專以鬪毆為事文
宣並收掩付獄天恩等十餘人皆棄市長弼鞭一百尋
為營州刺史在州無故自驚亡入突厥竟不知死所
襄樂王顯國神武從祖弟也無才技直以宗室謹厚天
保元年封襄樂郡王位右衛將軍卒

上洛王思宗神武從子也性寬和頗有武幹天保初封上洛郡王歷位司空太傅薨於官子元海累遷散騎常侍自陳願處山林修行釋典文宣許之乃入林慮山經二年絕棄人事志不能固自啟求歸徵復本任乃更縱酒肆情廣納姬侍尋除領軍將軍元海器小志大頗以智謀自許皇建末孝昭幸晉陽元海以散騎常侍留典機密初孝昭之誅楊愔也謂武成云事成以汝為皇太子及踐位立其子百年為皇太子留濟南於鄴使武成

居守以兵衛之武成意不平既而除領軍庫狄伏連為幽州刺史以斛律豐樂為領軍蓋以分武成之權也武成留伏連而不聽豐樂視事乃與河南王孝瑜偽獵謀之於野際夜乃歸先是童謠云中興寺裏白鳧翁四側聽聲雍雍道人聞之夜打鐘時丞相府在北城中即舊中興寺也鳧翁謂雄雞武成小字步落稽也道人濟南小名也打鐘言將被擊也未幾太史奏言北城有天子氣孝昭以為濟南之祥使平秦王歸彥之鄴迎濟南

赴并州將除之武成以告元海并問自安之計元海曰
皇太后萬福主上至性非常殿下不須別慮武成曰此
豈我推誠之意邪元海乞遷省思之時既夜武成留不
聽去元海繞牀萬匝達旦不寐夜漏未盡武成遽出曰
神算如何曰夜中有三策恐不適用耳因引梁孝王懼
誅入關事請乘數騎入晉陽先見太后求哀後見主上
請去兵權不干朝政以死為限此上策也若不見許當
更表請青齊二州刺史委政綱紀沉靖自居此中策也

更問下策曰發言即恐族誅因逼之曰濟南世嫡主上
假太后令而奪之今集文武示以此勅執豐樂斬歸彥
尊濟南號令天下以順討逆此萬世一時也武成大悅
狐疑竟未能用乃使鄭道謙卜之道謙云不利舉事靜
則吉又召曹魏祖訊以國事魏祖云當有大凶又時有
林慮令姓藩者頗知占候密謂武成曰宮車非久晏駕
殿下當為天下主武成拘之內庭以候之又令巫覡雜
卜皆云不須舉兵自有大慶武成乃奉詔送濟南於晉

陽至即見殺及孝昭崩武成即位除元海侍中開府儀
同三司太子詹事河清二年元海為和士開所譖武成
鞭之六十責之曰爾在鄴時教我以弟反兄幾許不義
以鄴城兵馬抗并州幾許無智不義無智若為可使出
為兗州刺史元海後妻陸太姬甥也以故尋被任使武
平中與祖珽共執朝政元海多以太姬密語告珽珽求
領軍元海不可珽乃以其所告報太姬姬怒出元海為
鄭州刺史鄴城將敗徵為尚書令周建德七年於鄴城

謀逆伏誅元海好亂樂禍詐行仁慈不飲酒噉肉文宣
天保末年敬信內法乃至宗廟不血食皆元海之為及
為右僕射又說後主禁斷屠宰原其本心非靖故終致
覆敗思宗弟思好本浩氏子也思宗養以為弟遇之甚
薄少以騎射事文襄文宣受命為左衛大將軍本名思
孝天保五年討蠕蠕文宣悅其驍勇謂曰爾擊賊如鷲
入鵝羣宜思好事故改名焉累遷尚書令朔州道行臺
朔州刺史開府南安王甚得邊朔人心後主時所骨光

弁奉使至州思好迎之甚謹光弁倨傲思好銜之武平
五年遂舉兵反與并州諸貴書曰主上少長深宮未辨
人之情偽昵近凶狡踈遠忠良遂使刀鋸刑餘貴溢軒
階商人醜類擅權帷幄剝削生靈劫掠朝市闇於聽受
專行忍害幽母深宮無復人子之禮二弟殘戮頓絕孔
懷之義仍縶子立奪馬於東門光弁掣鷹於西市馭龍
得儀同之號逍遙受郡君之名犬馬班位榮冠軒冕人
不堪役思長亂階趙郡王叡實曰宗英社稷是寄左丞

相斛律明月世為元輔威著隣國並非有辜奄見誅殄
孤既忝預皇枝實蒙殊獎今便擁率義兵指除君側之
惡幸悉此懷無致疑惑行臺郎王行思之辭也思好至
陽曲自號大丞相置百官以行臺左丞王尚之為長史
武衛趙海在晉陽時倉卒不暇奏矯詔發兵拒之軍士
皆曰南安王來我輩唯有奉迎耳帝聞變使唐邕莫多
婁敬顯劉桃枝中領軍庫狄士文馳之晉陽帝勒兵續
進思好軍敗與行思投水而死其麾下二千人桃枝圍

之且殺且招終不肯降以至於盡時帝在道叱奴世安
自晉陽送露布於城平都遇斛斯孝卿誘使食因
馳詣行宮大叫云已了帝大驩左右呼萬歲良久世安
乃以狀自陳帝曰爾告何物事乃得坐食於是賞孝卿
而免世安罪暴思好屍七日然後屠剥焚之烹尚之於
鄴市令內參射其妃於宮內仍焚殺之思好前反三旬
有人告其謀反韓長鸞女適思好子故奏言有人誣告
諸貴事相擾動不殺無以息後乃斬之思好既誅死者

弟伏闕為兄訴寃且求贈典長鸞抑而不通

平秦王歸彥字仁英神武族弟也父徽魏末坐事當徙涼州行至河渭間遇賊以軍功得免流因居於河州積年以解胡言為西域大使以功行河州事遂死焉徽於神武舊恩甚篤及神武平京洛迎徽喪為之營葬贈司徒謚曰文宣初徽嘗過長安市與婦人王氏私通而生歸彥至是年九歲神武追見之對之悲喜稍遷徐州刺史歸彥少質朴後更改節放縱好聲色妻魏上黨王元

天穆女也醜而如數與忿爭密啓文宣求離不報天保
初封平秦王嫡妃康及所生母王氏並為太妃善事二
母以孝聞徵為兼侍郎稍被親寵以討侯景功別封長
樂郡公除領軍大將軍領軍加大自歸彥始文宣誅高
德正金寶財貨悉以賜之乾明初拜司徒仍總知禁衛
濟南自晉陽之難楊愔宣勅留從駕兵五千於西中陰
備非常至鄴數日歸彥乃知之由是陰怨楊燕等楊燕
等欲去二王問計於歸彥歸彥詐喜請與高元海謀之

元海亦口許心違馳告長廣楊燕之戮歸彥有力焉孝
昭將入雲龍門都督成休寧列仗拒而不內歸彥諭之
然後得入進向栢閣永巷亦如之孝昭踐阼以此彌見
優重每入常坐平原王段韶上尋除司空兼尚書令齊
制宮內唯天子紗帽臣下皆戎帽特賜歸彥紗帽以寵
之孝昭崩歸彥從晉陽迎武成于鄴及武成即位進位
太傅領司徒常聽將私部曲三人帶刀入仗從武成還
都諸貴戚等競要之其所往處一坐盡傾歸彥既地居

將相志意盈滿發言陵侮傍若無人議者以威權震主必為禍亂上亦尋其前後翻覆之迹漸忌之高元海畢義雲高乾和等咸數言其短遂出歸彥為冀州刺史上幸歸彥第召魏收對御作詔欲加右丞相收曰至尊以右丞相登極今為歸彥威名大盛故出之豈可復加此號乃拜太宰冀州刺史即命乾和繕寫畫日仍勅門司不聽輒內時歸彥在家縱酒經宿不知至明欲參至門知之大驚而退及通名謝勅令早發又勅武職督將悉

送至清陽宮送者再拜而退莫敢共語唯趙郡王叡與語久之時無聞者至州不自安遂謀逆置私驛於南境上偵伺朝廷動息時車駕將幸晉陽歸彥謀乘虛入鄴又以時未受調欲班賜軍士訖然後發郎中令呂思禮知其謀以狀告詔遣平原王段韶嚴之歸彥聞有王師乃嬰城距守先是冀州刺史宇文弼司馬李祖挹別駕陳季璩中役事房子弼長樂郡守尉普興等疑歸彥有異亦連名密啟歸彥追而獲之遂收禁仲鸞等五人

脅之從逆仲鸞等不從皆殺之軍已逼城歸彥登陴大
叫云孝昭皇帝初崩六軍百萬衆悉由臣手此時投身
向鄴迎陛下今日豈有異心正恨高元海畢義雲高乾
和誑惑聖上疾忌忠良但為殺此三人即臨城自刎其
後城破單騎北走至交津見獲鎖送鄴帝令趙郡王叡
私問其故歸彥曰使黃頴小兒牽挽我何得不反曰誰
邪歸彥曰元海乾和豈是朝廷老宿如趙家老公時又
詎懷怨於是帝又使讓焉對曰高元海受畢義雲宅用

作本州刺史給後部鼓吹臣為藩王太宰反無正欲殺
元海義雲而已上令都督劉桃枝牽入歸彥猶作前語
望活帝命群臣議其罪皆云不可赦乃載以露車銜枚
面縛使桃枝臨之以刃擊鼓隨之并子孫十五人皆棄
市贈仁州刺史初魏時山崩得二石角藏在武庫文宣
嘗賜役臣兵器特以二石角與歸彥謂曰爾事恒山不
得反事長廣得反反時將此角嚇漢歸彥額角三道著
幘不安文宣見之怒使以馬鞭擊其額流血被面曰爾

反時當以此骨嚇漢其言反竟驗云

武興王普字德廣歸彥兄歸義之子也性寬和有度量
年九歲與歸彥自河州俱入洛神武使與諸子同游處
天保初封武興郡王武平二年累遷司空六年為豫州
道行臺尚書令後主奔鄴就加太宰周師逼乃降卒於
長安贈上開府豫州刺史

長樂太守靈山字景嵩神武族弟也從神武起兵信都
終長樂太守贈大將軍司空謚曰文宣子懿卒於武平

鎮將無子文宣以靈山從父兄齊州刺史建明子伏護
為靈山後伏護字臣拔粗有刀筆天統初累遷黃門侍
郎伏護厯事數朝恒叅機要而性嗜酒每多醉失末路
逾劇乃至連日不食神識恍惚遂以卒贈兗州刺史建
國侯孫乂嚴乂少謹厚武平末給事黃門侍郎隋開皇
中為太府少卿坐事死

神武諸子

神武十五男武明婁皇后生文襄皇帝文宣皇帝孝昭

皇帝襄城景王清武成皇帝博陵文簡王濟王氏生永
安簡平王浚穆氏生平陽靖翼王淹大爾朱氏生彭城
景思王浹華山王徽韓氏生上黨剛肅王渙小爾朱氏
生任城王湣游氏生高陽康穆王湜鄭氏生馮翊王潤
馬氏生漢陽敬懷王洽

永安簡平王浚字定樂神武第三子也初神武納浚母
當月而有孕及產後疑非已類不甚愛之而浚早慧後
更被寵年八歲時問博士盧景裕曰祭神如神在此為

有神邪無神邪裕曰有神浚曰有神當云祭神神在何
煩云如景裕不能荅及長嬉戲不節嘗以屬請受納大
見杖罰遂折節讀書元象中封永安郡公豪爽有氣力
善騎射為文襄所愛文宣性雌懦每參文襄有時洩出
浚恒責帝左右何不為二兄拭鼻由是見銜累遷中書
監兼侍中出為青州刺史雖頗好游畋而聰明矜恕上
下畏悅之保定初進爵為王文宣末年多酒失浚謂親
近曰二兄舊不甚了了自為帝識解頓進今沈湎敗德

朝臣無敢諫者大敵未滅吾殊以為憂欲乘驛至鄴面
陳不知吾言見用不或者以告帝愈銜之八年來朝從
幸東山帝裸程為樂雜以婦女又自作狐掉尾戲曲盡
醜態浚進言此非人主所宜帝甚不悅時楊遵彥侍側
浚引於屏處責其不諫帝雅不欲大臣與諸王交語遵
彥懼以聞帝大怒曰小人由來難忍遂罷酒還宮浚尋
還州又上書切諫詔令徵浚浚懼禍稱疾不朝上令馳
驛收浚老幼泣送者數千人及至盛以鐵籠與上黨王

渙俱寘北城地牢下飲食搜穢共在一所明年帝親將左右臨穴歌謳令浚等和之浚等惶怖聲戰帝為愴然泣下將赦之長廣王湛先與浚不睦進曰猛虎出押寧無噬人帝嘿然浚等聞之呼湛小名曰步落稽皇天見汝左右聞者莫不悲傷浚渙皆有雄畧為諸王所傾服帝恐為害乃先自刺浚渙使劉桃枝等繼之槩每下浚渙輒以手拉折於是投炬於籠中燒殺之加石土其上後出其屍皮髮皆盡天下寃之帝以浚妃陸氏配儀同

劉郁捷郁捷帝蒼頭也以軍功見寵當剏浚時郁捷實中其要害故以配焉後數日帝以陸氏先無寵於浚勅與離絕乾明元年贈太尉無子詔以彭城王浹第二子準字茂則嗣

平陽靖翼王淹字子邃神武第四子也元象中封平陽郡公累遷尚書左僕射天保初進爵為王厯位尚書令開府儀同三司司空太尉皇建初為太傅與彭城河間王並給仗身羽林百人太寧元年遷太宰性沉謹以寬

厚稱河清三年薨於晉陽或云以酖終還葬鄴贈假黃鉞太宰錄尚書事子德素嗣

彭城景思王洸字子深神武第五子也元象二年拜通直散騎常侍長樂郡公博士韓毅教洸書見洸筆迹未工因戲洸曰五郎書畫如此忽為常侍開國今日後宜更用心洸正色荅曰昔甘羅幼為秦相未聞能書凡人唯論才具何如豈必勤勤於筆迹博士當今能書者何為不作三公時年蓋八歲矣毅甚慙除驃騎大將軍開

府武定六年出為滄州刺史為治嚴察部內肅然守令
參佐下及胥吏行游往來皆自齎糧食汝多伺察民間
之事纖介皆知有隰拔縣主簿張達嘗詣州夜投民家
民為設雞臠汝調知之達至廷參汝謂之曰昨食雞羹
其自獻之邪抑邀之使辦也達皇恐伏罪又有士人自
幽州騎驢至滄州界逢一少年求與為伴行數里許其
人疲極息於道上少年遂驅其驢由支徑以去不知所
如往士人以告州汝曰驢上當無他負載乎曰無唯有

鹿脯一肋耳洩乃密令人分市鹿脯城中而得鹿肋於肆推所從求竟獲盜驢者境內號為神明轉都督定州刺史民有訴失牛者洩訪之曰所失微有別識否民言驪牛而自領以下達於尻其毛皆白他無類者長史韋道建謂中從事魏道勝曰史君在滄州禽姦如神今若得此賊定神矣洩乃詐為臺符市牛皮而高其直盜利其估也果持皮出售洩案其毛色而執之道建等驚服又有老嫗自列云孤貧唯仰種蔬自給每被竊取而不

得其主名洩夜令左右往書菜葉為字明旦於市中物
色皆得之自是州境無復盜賊治為當時第一天保初
封彭城王四年徵為侍中民吏送別悲號滿道有老父
數百人相率具饌餞洩於野曰自殿下來至今五載唯
飲此鄉水未食百姓食今當遠別聊獻疏薄用表至誠
洩重違其意為食一口而去七年轉司州牧選從事皆
取文才之士詳練法律明於剖斷者當時稱為美選州
舊按五百餘洩未期悉斷盡別駕羊脩等恐犯權威乃

詣閣諮陳淑使告曰吾直道而行何憚權威卿等當成人之美反以權威為言脩等慙悚而退後加特進兼司空太尉州牧如故太妃薨解任尋復本官俄拜司空兼尚書令濟南嗣位除開府儀同三司尚書令領大宗正卿皇建初拜大司馬兼尚書令轉太保武成入承大業遷太師錄尚書事淑明練世務果於決斷事無大小咸悉以情趙郡李公統預高歸彥之逆其母崔氏即御史中丞崔昂之從父姊兼右僕射魏收之內妹也依今年

出六十例免入官崔增年陳訴所司以昂收故崔遂獲免收槌發其事昂等以罪除名自後車駕巡幸常留守鄴河清三年三月羣盜白子禮等數十人劫收為主詐稱使者至收第入內室稱勅牽收上馬臨以白刃欲引向南殿收大呼不從遂殺之時年三十二朝野痛惜焉初收之未遇劫也其妃鄭氏夢人斷收首持去惡之數日而收被害贈假黃鉞太師太尉錄尚書事給輜輶車子寶德嗣位開府兼尚書左僕射

上黨剛肅王渙字敬壽神武第七子也天姿雄桀倣
不羣雖在童幼恒以將畧自許神武壯而愛之曰此兒
似我及長力能扛鼎材武絕倫每謂左右曰人不可無
學但要為博士耳故讀書頗知梗槩而不甚耽習元
象中封平原郡公文襄之遇賊渙年尚幼在西學間宮
中謹驚曰大兄必遭難矣彎弓而出武定末除冀州刺
史在州有美政天保初封上黨王厯中書令尚書左僕
射與恒山王演等築伐惡諸城遂聚鄴下輕薄陵犯郡

縣為法司所糾文宣戮其左右數人渙亦被譴六年率
衆送梁王蕭淵明還江南仍破東關斬梁侍進裴之橫
等威名甚盛八年錄尚書事初術士言亡齊者黑衣由
是自神武後每出行不欲見桑門為黑衣故也是時文
宣幸晉陽以所忌問左右曰何物最黑對曰莫過漆帝
以渙第七為當之乃使庫真都督破六韓伯昇之鄴徵
渙渙至紫陌橋殺伯昇而逃憑河而度土人執以送官
帝用鐵籠盛之與永安王浚同置地牢下歲餘與浚同

見殺時年二十六以其妃李氏配馮文洛文洛乃帝家舊奴積勞位至刺史帝令文洛等殺渙故以其妻妻焉乾明元年始收二王餘骨葬之贈司空謚曰剛肅有勅李氏還第而文洛尚以故意脩飾詣李李盛列左右引文洛立於階下數之曰遭難流離以至大辱志操寡薄不能自盡幸蒙恩詔得返蕃闈汝是誰家奴猶欲見侮於是杖之一百流血灑地渙無嫡子庶長子寶嚴以河清二年罷爵位終金紫光祿大夫開府儀同三司

襄城景王清神武第八子也美容貌弱年有龍望元象
中封章武郡公天保初封襄城郡王二年春薨齊氏諸
王選國臣府佐多取富商羣小鷹犬少年唯襄城廣寧
蘭陵王等頗引文藝清識之士當時以此稱之乾明元
年二月薨贈假黃鉞太師太尉錄尚書事無子詔以恒
山王演第二子亮嗣亮字彥道性恭孝美風儀好文學
為徐州刺史坐奪商人財物免官後主敗奔鄴亮役焉
遷兼太尉太傅周師入鄴亮於啟夏門拒守諸軍皆不

戰而敗周軍既入城亮方退走亮入太廟行馬內痛哭
拜辭然後為周軍所執入關依例授儀同分配遠邊卒
於龍州

任城王潛神武第十子也少明慧天保初封自孝昭武
成時車駕還鄴常令潛鎮晉陽總并省事厯司徒太尉
并省錄尚書事天統三年拜太保并州刺史別封正平
郡公時有婦人臨汾水浣衣有乘馬人換其新靴馳而
去者婦人持故靴詣州言之潛召居城諸嫗以靴示之

紿曰有乘馬人於路為賊所害遺此靴馬得無親屬乎
一嫗撫膺哭曰兒昨著此向妻家如其語捕獲之時稱
神明武平初遷太師司州牧出為冀州刺史加太宰遷
右丞相都督青州刺史潛頻牧大蕃雖不潔已然寬恕
為吏民所懷五年青州人崔蔚波等夜襲州城潛倉卒
部分號令齊整擊賊大破之拜左丞相轉瀛州刺史後
主奔鄴加潛大丞相及安德王稱尊號於晉陽使劉子
昂脩啟於潛云至尊出奔宗廟既重羣公勸逼權主號

令事寧終歸叔父潛曰我人臣何容受此執子昂送鄴
帝至濟州禪位於潛竟不達潛與廣寧王孝珩於冀州
召募得四萬餘人拒周軍周齊王憲來伐先遣送書并
赦詔潛並沉諸井戰敗潛孝珩俱被禽憲曰任城王何
苦至此潛曰下官神武皇帝子兄弟十五人不幸而獨
存逢宗社傾覆今日得死無媿墳陵憲壯之歸其妻子
將至鄴城潛馬上大哭自投于地流血滿面至長安尋
與後主同死妃盧氏賜斛斯徵盧蓬首垢面長齋不言

笑徵放之乃為尼隋開皇三年表請文帝葬潛及五子於長安北原

高陽康穆王湜神武第十一子也天保元年封十年稍遷尚書令以滑稽便辟有寵於文宣常在左右行杖以撻諸王太后深銜之其妃父護軍長史張晏之嘗要道拜湜湜不禮焉帝問其故對曰無官職漢何禮之有帝於是擢拜晏之為徐州刺史文宣崩湜兼司徒導引梓宮於馬上吹笛云至尊頗知臣不又擊邊鼓為樂太后

杖提百餘未幾薨太后哭之哀曰我恐其不成就與杖
何期帶創死也乾明初贈假黃鉞太師司徒錄尚書事
子士義襲爵

博陵文簡王濟神武第十二子也天保元年封濟嘗從
文宣巡幸於路忽憶太后遂逃歸帝怒臨以白刃因此
驚恍歷位太尉河清初出為定州刺史天統五年在州
語人云計次第亦應到我後主聞之陰使人殺之贈假
黃鉞太尉錄尚書事子智襲爵

華山王凝神武第十三子也天保元年封新平郡王九年改封安定十五年封華山厯位中書令齊州刺史就加太傅薨於州贈左丞相太師錄尚書凝諸王中最為孱弱妃王氏太子洗馬王洽女也與蒼頭姦凝知而不能限禁後事發王氏賜死詔杖凝一百其愚如此

馮翊王潤字子澤神武第十四子也幼時神武稱曰此吾家千里駒也天保初封歷位東北道行臺右僕射都督定州刺史潤美姿儀年十四五母鄭妃與之同寢有

穢雜之聲及長廉慎方雅習於吏職至於擿發隱偽姦
吏無所匿其情開府王回洛與六州大都督獨孤枝侵
竊官田受納賄賂潤案舉其事二人表言王出送臺使
登魏孝文舊壇南望嘆息不測其意武成使元文遙就
州宣勅曰馮翊王少小謹慎在州不為非法朕信之熟
矣登高望遠人之常情鼠輩欲輕相間構曲生眉目於
是回洛決鞭二百獨孤枝決杖一百尋為尚書令領太
子少師歷司徒太尉大司馬司州牧太保河南道行臺

錄尚書事別封文成郡公太師太宰復為定州刺史薨
贈假黃鉞左丞相子茂德嗣

漢陽敬懷王洽字敬延神武第十五子也天保元年封
五年薨年十三乾明元年贈太保司空無子以任城王
第二子建德為後

文襄諸子

文襄六男文敬元皇后生河間王孝琬宋氏生河南王
孝瑜王氏生廣寧王孝珩蘭陵王長恭不得母氏姓陳

氏生安德王延宗燕氏生漁陽王紹信

河南康獻王孝瑜字正德文襄長子也初封河南郡公
齊受禪進爵為王歷位中書令司州牧初孝瑜養於神
武宮中與武成同年相愛將誅楊愔等孝瑜預其謀及
武成即位禮遇特隆孝瑜容貌魁偉精彩雄毅謙慎寬
厚兼愛文學讀書敏速十行俱下覆碁不失一道初文
襄於鄴東起小池游觀時俗眩之孝瑜遂於第作水堂
龍舟植幡綃於舟上數集諸弟宴射其間遂為諸王所

慕尚武成幸其第見而悅之故盛興後園之役武成嘗
使和士開與胡后對坐握槊孝瑜諫曰皇后天下之母
不可與臣下接手帝深納之後又言趙郡王父死非命
不可親近由是獻及士開皆側目士開既密告其奢僭
獻又言山東唯聞有河南王不聞有陛下帝由是忌之
有爾朱御女者本事太后孝瑜先與之通後因太子婚
夜孝瑜竊與之言武成大怒頓飲其酒三十七盃使婁
子彥載以出鵠之於車孝瑜體素肥大腰帶十圍至西

華門藥發煩熱躁悶投水而絕贈太尉錄尚書事子弘
節嗣孝瑜母魏吏部尚書宋弁孫也本魏潁川王斌之
妃為文襄所納生孝瑜孝瑜還第為太妃孝瑜妃盧正
山女武成胡后之內姊也孝瑜薨後宋太妃為盧妃所
譖武成殺之

廣寧王孝珩文襄第二子也歷位司州牧尚書令司空
司徒錄尚書事大將軍大司馬孝珩愛賞人物學涉經
史好綴文有技藝嘗於聽事畫一蒼龍見者疑以為真

又作朝士圖當時稱為妙絕後主自晉州敗奔鄴詔王公朝士議於含光殿孝珩曰大敵既深事藉機變宜使任城王領幽州道兵入土門揚聲趣并州獨孤永業領洛州道兵趣潼關揚聲取長安臣請領京畿兵出自滏口鼓行逆戰賊軍遠來日增疲老聞南北有兵自然潰散又請出宮人寶物賞賜將士帝不能用承光即位以孝珩為太宰孝珩與呼延族莫多婁敬顯尉相願同謀期以正月五日自於千秋門斬高阿那肱令相願以禁

兵應之於內族與敬顯自游豫園勒兵出盡誅韓長鸞等既而阿那肱從別宅取便路入宮事不果孝珩乃求領兵出拒西軍謂高阿那肱韓長鸞陳德信等曰聞朝廷遲疑不賜遣領兵擊賊豈畏孝珩反邪孝珩破宇文邕遂至長安反時何與國家事以今日之急猶作如此相猜疑他日從可知也高韓恐其有變出孝珩為滄州刺史孝珩至州以五千人會任城王於信都共為匡復之計周齊王憲來伐孝珩與周軍力戰兵弱不能敵暕

怒曰由高阿那肱小人吾道窮矣齊叛臣乞伏令和以
稍刺孝珩墜馬奴白澤以身扞之孝珩猶傷數處遂為
周所虜齊王憲問孝珩齊亡之由孝珩自陳國難辭淚
俱下俯仰有節憲為之改容親為灑創傳藥禮遇甚厚
孝珩歎曰李穆叔有言齊氏二十八年今果然矣自神
武皇帝以外吾諸父兄弟無有一人得至四十者命也
奈何嗣君無獨見之明宰相非柱石之寄恨不得握兵
符受廟筭身先士卒展我心力耳周人以孝珩歸長安

依例授開府縣侯後周武帝在雲陽宮宴齊之君臣自彈胡琵琶命孝珩吹笛孝珩辭曰亡國之音不足聽也固命之舉笛裁至口而淚下嗚咽周武乃止其年十月疾甚啟周武帝乞歸葬山東曰臣聞孤死首邱示不忘舊念臣先人墳柏在鄴武帝覽啟而哀之尋卒令葬於鄴

河間王孝琬文襄第三子也天保元年封天統中累遷尚書令初突厥與周師入太原武成將避之而東孝琬

叩馬諫請委趙郡王部分軍馬必能尅敵帝從其言孝
琬免胄將出帝使追還之周軍退拜并州刺史孝琬以
文襄世嫡驕矜自負河南王之死諸王在宮內莫敢舉
聲唯孝琬大哭而出又怨執政為草人擬而射之和士
開與祖珽諧之云草人擬聖躬也又前突厥至州孝琬
脫兜鍪抵地云豈是老嫗須著此此言屬大家也初魏
世謠言河南種穀河北生白楊樹頭金鷄鳴珽以謠說
帝曰河南河北河間也金鷄鳴孝琬將有建金鷄之事

也帝頗惑之時孝琬得佛牙置於第內夜有神光不以進御帝聞使搜之得填庫稍幡數百帝以為反狀訊其諸姬有陳氏者無寵誣對曰王嘗畫陛下像哭之為最勝其反固宜孝琬性孝每追慕文襄輒出其像對之悲泣至是陳氏以為言而不能辯帝怒令武衛赫連輔元倒鞭撻之孝琬大呼曰從阿叔乞命帝曰爾叔為誰敢喚天子作叔邪孝琬曰臣神武皇帝嫡孫文襄皇帝嫡子魏孝靜皇帝外甥何為不得喚陛下作叔也帝愈怒

折其兩脛而死瘞諸西山及帝崩乃得改葬子正禮嗣
幼聰穎能誦左氏春秋齊亡遷綿州卒

蘭陵武王長恭一名孝瓘文襄第四子也累遷中領軍
開府并州刺史突厥入晉陽長恭盡力擊破之芒山之
役長恭為中軍以五百騎再入周軍遂破其圍至金墉
下被圍甚急城上人不知其為蘭陵王也長恭免胄示
其面競下弩手救之於是大捷武士為蘭陵王入陣曲
以歌謠之進位尚書令司州牧歷青瀛二州刺史頗有

受納後為太尉與段韶共討柏谷又攻定陽親自督戰
大破之俘其衆以前後功別封鉅鹿長樂樂平高陽等
郡公遷大司馬領宗正芒山之捷後主謂長恭曰王入
陣太深萬一失利悔無所及長恭對曰家事親切不覺
遂然帝嫌其稱家事遂忌之定陽之役稍酷虐其屬尉
相願謂長恭曰王受朝寄何得如此貪殘長恭未及荅
相願曰豈不由芒山大捷恐以威武見忌故自穢乎長
恭曰然相願曰朝廷若忌王於此犯便當行罰本欲求

福反以速禍也長恭遽前執其手求自安術相願因勸
長恭杜門屬疾謝絕時事長恭然其言而未能即退及
江淮有事恐復為將領憂懼成疾因而不治武平四年
帝使徐之範齎鴈賜死長恭謂妃鄭氏曰我以忠見誅
天道殆不可曉邪妃曰何不求見自列長恭曰此爵既
頒何由可見飲之而薨贈太尉長恭貌柔心壯音容兼
美其為將也躬勤細事每得甘美乃至一瓜數果必與
將士共之初在瀛州行參軍陽士深表列其贓免官及

討定陽士深在軍恐禍及長恭聞之曰何待我之淺也
乃求小失杖二十以安之嘗朝退僕從盡散長恭獨還
無所譴罰武成賞其功命賈護為買妾二十人長恭唯
受其一有千金責券臨死燔之

安德王延宗文襄第五子母陳氏魏廣陽王妓也延宗
幼為文宣所養甚愛之年十二猶騎置腹上令溺已臍
中抱之曰可憐止有此一箇問欲作何王對曰欲作衝
天王文宣問楊愔愔曰天下安得此郡名今取其義願

使安於德於是封安德焉為定州刺史於樓上大便使
人在下張口承之以炆猪糝和人糞以飼左右有難色
者鞭之孝昭帝聞之使趙道德就州杖之一百道德以
延宗受杖不謹又加三十未幾又以囚試刀驗其利鈍
驕縱多不法武成使撻之殺其昵近九人自是深自改
悔蘭陵王芒山凱旋自言兵勢諸兄弟咸壯之延宗獨
曰四兄非大丈夫何意不乘勝徑入使延宗當此勢關
西豈得復存及蘭陵死妃鄭氏以頸珠施佛廣寧王使

贖之延宗手書諫之而滴淚滿紙河間死延宗哭之出血又結草為武成像鞭而訊之曰我兄無罪何故殺之奴以狀告武成覆卧延宗於地鞭之二百幾死後厯司徒太尉及平陽之役後主自晉陽禦之命延宗率右軍先進戰於城下禽周開府宇文挺等十數人及大戰延宗以麾下再入周軍氣壯兵銳敵人莫不披靡俄而諸軍敗延宗一軍獨全後主將奔晉陽延宗奏言大家但在營莫動以兵馬付臣臣必能破之帝不納及至并州

不守周軍入勦鼠谷乃下詔以延宗為相國并州刺史
總山西兵事謂曰并州阿兄自取兒今去也延宗曰陛
下為社稷自重臣為陛下出力死戰駱提婆曰至尊計
已定王不得輒沮後主竟奔鄴在并州將卒固請延宗
即尊位皆云王若不作天子諸人實不能與王出死力
延宗不得已即皇帝位下詔曰武平孱弱政由官豎釁
結蕭牆盜起疆場斬關夜遁莫知所之則我高祖之業
將墜於地王公卿士猥見推逼今便祗承寶位可大赦

天下改武平七年為德昌元年以晉昌王唐邕為宰輔
齊昌王莫多婁敬顯沘陽王和阿于子右衛大將軍段
暢武衛將軍相里僧伽開府韓骨胡侯莫陳洛州等為
爪牙衆聞之不召而至者前後相屬延宗容貌充壯坐
則仰偃則伏人皆笑之及是赫然奮發氣力絕異馳騁
行陣勁捷若飛傾府藏及後宮美女以賜將士又籍沒
內參千餘家後主謂近臣曰我寧使周得并州不欲使
安德得之左右曰理然延宗見士卒皆親執手陳辭自

稱名流涕嗚咽衆皆爭為死童兒女子亦棄屋攘袂投
輒石以擊周軍特進開府那盧安生守太谷以萬兵叛
周軍圍晉陽望之如黑雲四合延宗有衆四萬命莫多
婁敬顯韓骨胡拒城南和阿于子段暢拒城東延宗親
當周齊王於城北奮大稍往來督戰所向無前尚書令
史沮山亦肥大多力捉長刀步從殺傷甚多武衛蘭芙
蓉慕連延長皆死于陣和阿于子段暢以千騎投周軍
周軍盡銳攻東門際晷遂入進兵焚佛寺門屋飛焰照

天地延宗與敬顯率壯士自西門入夾擊周軍周軍大亂爭門相填壓塞路不得進齊人從後斫刺死者二千餘人多禁衛諸公子周武帝左右畧盡自拔無路承御上士張壽輒牽馬頭賀拔佛恩以鞭拂其後崎嶇僅得出齊人奮擊幾中馬至城東阮曲佛恩及降者皮子信為之導僅免時四更也延宗謂周武帝死於亂兵使於積屍中求長鬣不得時齊人既勝入坊飲酒盡醉卧延宗不能復整周武帝出城饑甚欲為遁計齊王憲及柱

國王誼諫以為去必不免段暢又盛言城內空虛無繼
援周武帝乃駐馬鳴角收兵俄頃復振詰旦還攻東門
克之又入南門延宗戰力屈走至城北於民家見禽周
武帝自投下馬執其手延宗辭曰死人手何敢逼至尊
帝曰兩國天子有何怨惡直為百姓來耳勿怖終不相
害使復衣帽而禮之先是高都郡有山焉絕壁臨水忽
有墨書云齊亡延宗洗視愈明帝使人就寫使者改亡
為上至是應焉延宗以十二月十三日晡時受勅守并

州明日建尊號不間日而被圍經宿至食時而敗年號
德昌好事者言其得二日云既而周武帝問鄴城若為
取延宗辭曰亡國大夫不可與圖存此非臣所及彊問
之乃曰若任城王援鄴臣不能知若今主自守陛下兵
不血刃及至長安周武與齊之君臣飲酒令後主起舞
延宗悲不自持屢欲仰藥自裁傳婢苦執諫而止未幾
周武誣後主及延宗等云遙應穆提婆謀反賜死皆自
陳無之延宗攘袂泣而不言以椒塞口而死明年李妃

收殞之後主之傳位於太子也孫正言竊謂人曰我昔
武定中為廣州士曹聞襄城人曹普演有言高王諸兒
阿保當為天子至高德之承之當滅阿保謂天保德之
謂德昌也承之謂幼主年號承光其言竟信云

漁陽王紹信文襄第六子也歷特進開府中領軍護軍
青州刺史行經漁陽郡有鉅富人鍾長命紹信引與同
坐太守鄭道蓋來謁長命欲起紹信不聽曰何物小人
乃煩主人公為起乃與長命結為弟兄使其妃行家人

禮責長命贈賄百萬鍾氏因此貧乏齊滅死於長安

文宣諸子

文宣五男李后生廢帝及太原王紹德馮世婦生范陽王紹義裴嬪生西河王紹仁顏嬪生隴西王紹廉

太原王紹德文宣第二子也天保末為開府儀同三司武成因怒李后詔紹德曰爾父擊我時竟不來救以刀鐶築殺之親以土埋之游豫園武平元年詔以范陽王子辨才為後龍太原王

范陽王紹義文宣第三子也初封廣陽徙封范陽歷位
侍中清都尹好與羣小同飲擅使內參歐殺博士任方
榮武成杖之二百送付昭信后后又杖一百及後主奔
鄴以紹義為尚書令定州刺史周武帝克并州以封輔
相為北朔州總管此州齊之重鎮諸勇士多聚焉前長
史趙穆司馬王當萬等謀執輔相迎任城王於瀛州事
不果遂迎紹義紹義至馬邑先是輔相及其屬韓阿各
奴等數十人皆齊叛臣自肆州以北城戍二百八十餘

盡從輔相及紹義至皆反馬紹義與靈州刺史袁洪猛引兵南出欲取并州至新興而肆州已為周守前隊二儀同以所部降周周兵擊顯州執刺史陸瓊又攻陷諸城紹義還保北朔周將宇文神舉軍逼馬邑紹義遣杜明達拒之兵大敗紹義曰有死而已不能降人遂奔突厥眾三千家徙之紹義令之曰欲還者任意於是哭拜別者太半突厥他鉢可汗謂文宣為英雄天子以紹義重蹙似之甚見愛重凡齊人在北者悉隸紹義高寶寧

在營州表上尊號紹義遂即皇帝位稱武平元年以趙
穆為天水王他鉢聞寶寧得平州亦招諸部各舉兵南
向云共立范陽王作齊帝為其報讐周武帝大集兵於
雲陽將親北伐遇疾暴崩紹義聞之以為天贊已也盧
昌期據范陽亦表迎紹義俄而周將宇文神舉攻滅昌
期其日紹義適至幽州聞周守將出兵于外欲乘虛取
薊城列天子旌旗登故昭王冢乘高望遠部分兵衆神
舉遣大將軍宇文恩將四千人馳救幽州半為齊軍所

殺紹義聞范陽城陷素服舉哀回軍入突厥周人購之於他鉢又使賀若誼往說之他鉢猶不忍遂偽與紹義獵於南境使誼執之以歸流於蜀紹義妃勃海封孝琬女自突厥逃歸紹義在蜀遺妃書云夷狄無信使吾至此竟死蜀中

西河王紹仁文宣第四子也天保末為開府儀同三司尋薨

隴西王紹廉文宣第五子也初封長樂後改焉性麤暴

嘗拔刀逐范陽王紹義紹義走入廐閉門拒之乃免紹義初為清都尹未及理事紹廉先往喚囚悉出率意決遣之能飲酒一舉數升終以此薨

孝昭諸子

孝昭七男元皇后生樂陵王百年桑氏生襄城王亮出後襄城景王諸姬生汝南王彥理始平王彥德城陽王彥基定陽王彥康汝陽王彥忠

樂陵王百年孝昭第二子也孝昭即位立百年為皇太

子納斛律光長女為妃帝臨崩遺詔傳位於武成并有
手書其末曰百年無罪汝可以樂處置之勿學前人大
寧中封樂陵王河清三年五月白虹圍日再重又橫貫
而不達赤星見帝以盆承星影而蓋之一夜盆自破欲
以百年厭之會博陵人賈德胄教百年書百年嘗作數
勅字德胄封之以奏帝又發怒使召百年百年被召自
知不免割帶玦留與妃斛律氏見帝於元都苑涼風堂
使百年書勅字驗與德胄所奏相類遣左右亂捶擊之

又令人拽百年走遶堂下且走且擊所厯處血皆徧地
氣息將盡曰願與阿叔作奴遂斬之弃池中池水盡赤
帝於後園親臨瘞之妃把玦哀號不食月餘亦死玦猶
在手拳不可開時年十四其父光自擘之乃開後主時
改九院為二十七院掘地得小屍緋袍金帶一髻一解
一足有靴諸內參竊言百年太子也或以為太原王紹
德詔以襄城王子白澤龔爵樂陵王齊亡入關徙蜀死
汝南王彥理武平初封王位開府清都尹齊亡入關隨

例授儀同大將軍封縣子女入太子宫故得不死隋開
皇初卒於并州刺史始平王彥德城陽王彥基定陽王
彥康汝南王彥忠與汝南王同受封並加儀同後事闕

武成諸子

武成十三男胡皇后生後主及琅琊王儼李夫人生南
陽王綽後宮生齊安王廓北平王貞高平王仁英淮南
王仁光西河王仁機樂平王仁邕潁川王仁儉安樂王
仁雅丹陽王仁直東海王仁謙

南陽王綽字仁通武成長子也以五月五日丙時生至
午時後主乃生武成以綽母李夫人非正嫡故貶為弟
初名融字君明出後漢陽王河清三年改封南陽別為
漢陽置後綽始十餘歲留守晉陽愛波斯狗尉破胡諫
之綽歛然所殺數狗狼籍在地破胡驚走不敢復言後
為司徒冀州刺史好裸人畫為獸狀縱犬噬而食之左
轉定州汲井水為後池在樓上彈人好微行游獵無度
恣情彊暴云學文宣伯為人有婦人抱兒路中逢之走

避入草綽奪其兒飼波斯狗婦人號哭綽怒又縱狗使食婦人狗不食塗以兒血乃食焉後主聞之詔鎖綽赴行在所至而宥之問在州何者最樂對曰多取蝎混蛆中觀之極樂後主即夜索蝎一斗比曉得二三升置諸浴斛使人裸卧其中號叫宛轉帝與綽臨觀喜噓不已謂綽曰有如此樂事何不早馳驛奏聞綽由是大為後主所寵拜大將軍朝夕同戲韓長鸞惡之綽尋除齊州刺史將發長鸞令綽親信誣告其反有司奏處大辟後

主不忍顯戮使寵胡何猥薩於後園與綽角戲因搯殺之瘞於興聖佛寺經四百餘日乃歛顏色毛髮皆如生俗云五月五日生者腦不壞故也綽兄弟皆呼父為兄兄嫡母為家家乳母為姊姊婦為妹妹齊亡妃鄭氏為周武帝所幸請葬綽所司葬於永平陵北

琅邪王儼字仁威武成第三子也初封東平王拜開府侍中中書監京畿大都督領軍大將軍領御史中丞遷大司徒尚書令大將軍錄尚書事大司馬魏氏舊制中

丞出千步清道與皇太子分路行王公皆遙住車去牛
頓軛於地以待中丞過其或遲違則赤捧捧之自都鄴
後此儀浸絕武成欲雄寵儼乃使一依舊制儼初從北
宮出將上中丞凡京畿步騎領軍之官屬中丞之威儀
司徒之鹵簿莫不畢備帝與胡后在華林園東門外張
幕隔青紗步障觀之遣中尉驟馬趣仗不得入自言奉
勅赤捧應聲碎其鞍馬驚人墜帝大笑以為善更勅令
駐車傳語良久觀者傾京邑儼恒居宮中坐含香殿視

事諸父皆拜焉帝幸并州儼恒居守每送駕或中道或至晉陽乃還王師羅嘗從駕後至武成欲罪之辭曰臣與東平王別留連不覺晚武成憶儼為之下泣舍師羅不問儼器服翫飾皆與後主同所須悉官給於南宮嘗見新冰綠李還怒曰尊兄已有我何意無從是後主先得新奇屬官及工匠必獲罪太上胡后猶以為不足儼嘗患喉使醫下針張目不瞬又言於帝曰阿兄悞何能率左右帝每稱曰此黠兒也當有所成以後主為劣有

廢立之意武成崩改封琅邪儼以和士開駱提婆等奢恣意甚不平嘗衆詰之二人相謂曰琅邪眼光奕奕數步射人每奉對不覺汗出天威尚不爾也由是忌之武平二年出儼居北宮五日一朝不復得時見太后四月詔除太保餘官悉解猶帶中丞且以京畿北城有武庫欲移儼於外然後奪其兵權書侍御史王子宜與儼左右開府高舍洛中常侍劉辟彊說儼曰殿下被踈正由士開間構何可出北宮入百姓叢中也儼謂侍中馮子

琮曰士開罪重兒欲殺之子琮心欲廢帝而立儼因贊成其事儼乃令子宜表彈士開罪請付禁推子琮雜以他文書奏之後主不審省而可之儼誑領軍庾伏連曰奉勅令領軍收士開伏連以詔子琮且請覆奏子琮曰琅邪王受勅何須重奏伏連信之伏五十人於神虎門外詰旦執士開送御史儼使馮永洛就臺斬之儼徒本意唯殺士開及是因逼儼曰事既然不可中止儼遂率京畿軍士三千餘人屯千秋門外帝使劉桃枝將禁

兵八十人召儼桃枝遙拜儼命反縛將斬之禁兵散走
帝又使馮子琮召儼儼辭曰士開謀廢至尊欲剽家家
頭為尼罪合萬死臣為是矯詔誅之尊兄若欲殺臣不
敢逃罪若放臣願遣姊姊來迎臣臣即入見姊姊即陸
令萱也儼欲誘出殺之令萱執刀帝後聞之戰慄又使
韓長鸞召儼儼將入劉辟彊牽衣諫曰若不斬提婆母
子殿下無由得入廣寧安德二王適從西來欲助成其
事曰何不入辟彊曰人少安德王顧衆而言曰孝昭誅

楊遵彥只八十人今乃數千何言人少後主泣啟太后
當與家家永別乃急召斛律光儼時亦召之光聞儼殺
士開撫掌大笑曰龍子作事固自不似凡人入見後主
於永巷帝宿衛者步騎四百授甲將出光曰小兒輩
弄兵與交手即亂鄙諺曰奴見大家心死至尊宜自至
千秋門琅邪必不敢動皮景和亦以為然後主從之光
步道使人走出曰大家來儼徒駭散帝駐馬橋上遙呼
之儼猶立不進光就謂曰天子弟殺一漢何苦執其手

彊引以前請帝曰琅邪王年少輕為舉措長大自不復然願寬其罪帝拔儼帶刀鏤亂築辯頭良久乃釋之收伏連及高舍洛王子宜劉辟彊都督翟顯貴於後園帝親射之而後斬皆支解暴之都街下文武職吏盡欲殺之光以皆勲貴子弟恐人心不安趙彥深亦云春秋責帥於是罪之各有差儼之未獲罪也鄴城北有白馬佛塔石虎時為佛圖澄作也儼將修之巫云浮屠不可動動之北城當失主不從破至第二級得白蛇長數丈回

旋失之數旬而儼敗自是太后處儼於宮內食必自嘗之陸令萱說帝曰琅邪王聰明雄勇觀其相表殆非人臣自專殺已來常懷恐懼宜早為計何洪珍與和士開素善亦請殺之未決帝以食輿密迎祖珽問之珽稱周公殺管蔡季友酖慶父以對帝納其言以儼之晉陽使右衛大將軍趙元侃誘執儼元侃曰臣昔事先帝日見先帝愛王今寧就死不能行此帝出元侃為豫州刺史九月帝啟太后曰明旦欲與仁威出獵須早出早還是

夜四鼓帝召儼儼疑之陸令萱曰兄兄喚兒何不去儼
出至永巷劉桃枝反接其手儼呼曰乞見家家尊兄桃
枝以袖塞其口反袍蒙頭負出至大明宮鼻血滿面遂
拉殺之時年十四裹之以席埋於室內帝使啟太后臨
哭十餘聲即擁入殿明年三月葬於鄴西贈謚曰楚恭
哀帝以慰太后有遺腹四男生數月皆幽死以平陽王
淹孫世俊嗣儼妃李祖欽女也進為楚帝后居宣則宮
齊亡乃嫁焉

齊安王廓字仁弘武成第四子也性長者無過行位特進開府儀同三司定州刺史

北平王貞字仁堅武成第五子也沈審寬厚帝常曰此兒得我鳳毛位司州牧京畿大都督兼尚書令錄尚書事帝行幸總留臺事積年後主以貞長大漸忌之阿那肱承旨令馮士幹劾繫貞於獄奪其留後權

高平王仁英武成第六子也舉止軒昂精神無檢格位定州刺史

淮南王仁光武成第七子也性躁暴位清都尹次西河王仁機生而無骨不自支持次樂平王仁邕次潁川王仁儉次安樂王仁雅從小有瘡疾次丹陽王仁直次東海王仁謙皆養於北宮琅邪王死後諸王守禁彌切武平末仁邕已下始得出外供給儉薄取充而已尋後主窮蹙以廓為光州刺史貞為青州仁英為冀州仁儉為膠州仁直為濟州自廓已下多與后主死於長安仁英以清狂仁雅以瘡疾獲免俱徙蜀隋開皇中追還仁英

詔與蕭琛陳叔寶修其本宗祭祀未幾而卒

後主諸子

後主五男穆皇后生幼主諸姬生東平王恪次善德次賈德次質錢胡太后以恪嗣琅邪王尋夭折齊滅周武帝以任城主以下大小二十一王歸于長安皆有封爵其後不從戮者散配西土皆死於邊

通志卷八十五上